

# Tschaiver – betg per in e scadin

DA FLAVIA HOBI

■ **Tschaiver – tge è atgnamain il senn da quest usit? Per l'ina vegn festivà il temp avant la curaisma. Per l'autra duess il tschaiver era stgatschar l'en-viern.** Gea, per blers vegn il temp da tschaiver schizunt celebrà sc'ina tschintg'avla stagiun. Tscherts entschaivan gia mais avant

l'entschatta da tschaiver cun las preparaziuns – saja quai crear costumes, far emprovas cun la musica da tschaiver u construir e zambregiar vi da chars. Percunter munta quest temp per autras personas strusch insatge. «Cun tschaiver na poss jau entschaiver nagut» – aud'ins anc mintgatant.

Spezial vi dal tschaiver è era ch'ins po sa transmidar en differentas rollas. Gea, ins

resorta plitost sch'ins n'è betg transvestgì che sche schon. Ma atgnamain èsi er ina buna pussaivladad da finalmain pudair sa transformar en insatge ch'ins ha adina gia vulì esser – u betg!?. Ed il pli legher èsi lura sch'ìls auters dovràn in zic pli ditg fin ch'els enconuschan ins.

Fan da tschaiver u betg – senza discussiun è quai in usit fitg vivi qua tar nus. In usit ch'ins survegn segir cun ed usits chaschunan er adina ina tscherta atmosfera. Ina atmosfera ch'ins senta per il bler be durant quest temp. Tar mai munta il temp da tschaiver era ch'i na va betg ditg pli fin che la primavaira sa mussa. Inquals onns – probabel betg quest – creschan forsa schizunt schon las empremas galantinas da naiv en in u l'auter lieu. Ed exact da quests muments dattan a las stagiuns ina tscherta caratteristica, ina caratteristica familiarisada perquai ch'ella returna ming'onn.

Jau sper che quests che na pon entschaiver nagut cun il tschaiver sentian e vesian almain las chaussas bellas che la natira porscha. Als auters gjavisch jau bler plaschair ed oravant tut buna cundiziun durant questa tschintgavla stagiun. E naturalmain per tuts: Bun divertiment cun nosssa pagina!



Spezial vi dal tschaiver è era ch'ins po sa transmidar en differentas rollas.

KEYSTONE